

吳江縣續志卷二十四

寓賢

盧至周

方懋祿

戴延年

甘鳳池

盛百二陳祖范蔡寅斗吳懋政沈德潛

任啟運

何元長 孫昌齡從子其超

金農

錢杜

張庚沙神芝孫晉灝沈宗騫蔣寶齡

吳江縣續志

卷二十四

目錄

一

方垆

顧廣譽 賈敦臨敦良

蔡升初

陶淇 弟溶

陳春熙

吳江縣續志卷二十四

人物九

寓賢

盧至周字宣城浙江仁和人父崇熙潘耒女夫至周依舅氏以居強記過人長於史事凡治亂得失及郡邑屬國地名皆如指掌有讀史窺豹二十五篇臨歿命以其稿授秀水盛百二

方懋祿字澄園元和人乾隆十三年進士官江西清江縣知縣修長堤植巨木作棧棧如立護以木板介以鐵堅築之堤成鞏固補山東商河縣知縣有王化莊爲溢藪懋祿歲除冒雪突至捕之無得脫者仕至湖北襄陽府知府告歸卜居吳江城中

戴延年字壽愷長洲人善度曲詩古文法書皆工性蕭冷旅

吳江縣續志

卷二十四

人物九

一

居京師閉門枯坐不知人世事晚居吳江所著有吳語秋鐙叢話搏沙錄叢桂山房詩

甘鳳池江甯人嘗寓同里有病瘵者鳳池令與臥以已脊與病者脊相着病者汗出愈曰子病傳尸吾以眞火攻之蟲盡死矣鳳池以拳勇聞天下又得運氣煉神之術乾隆中卒

秀水盛百二館黎里陳氏先是常熟陳祖范館同里袁氏年七十餘矣而江陰蔡寅斗海鹽吳懋政皆主同里有年長洲沈文愨德潛則袁景輅輩執贄稱弟子往來同里最久也

任啟運本同里任氏其先白吳江遷荆溪嘗從其從父大任學亦居同里有年

何元長以字行青浦北筭山人以醫名蘇松嘉湖間少時嘗寓居莘塔孫昌齡字端叔亦旅寓邑之蘇家港最久元長從

子其超字古心少時亦嘗客莘塔何氏之醫自南宋至今日
代有聞人昌齡爲八豪宕自喜其超與婁姚椿善高伉疏俊
其詩曰藏齋詩集言詩之旨則以感時事言朝政爲出位無
一字用釋氏書曰草野未仕而著儒冠者宜爾也

金農字壽門浙江仁和人嘗客盛澤王鯤家書學天發神讖
碑當時罕有識其從來者近嘉興張廷濟始言農書從漢魏
六朝分隸鎔化今人少見古書故目以爲怪年五十餘始學
畫寫竹師石室老人號稽留山民繼畫梅師白玉蟾復號昔
耶居士又畫馬自得曹韓法趙王孫不足多也後寫佛像
號心出家盦粥飯僧其布置花木奇柯異葉非復塵世所覩
後僑寓揚州以終

錢杜字叔美亦仁和人杜足跡滿天下其畫名亦滿天下與

吳江縣續志

卷二十四

人物九

二

金農埒矣其族子名廷烺來丞吾邑丞駐盛澤杜因廷烺亦
來寓居後再娶震澤程氏結褵未逾月杜卽遠游不歸程名
雲和工詩依母居榜所居曰隔凡長齋繡佛垂四十餘年杜
有松壺畫贅畫憶各二卷

張庚字浦山嘉興人客授盛澤嘗以湖北學使蔣楸薦應博
學鴻辭試放歸庚善畫研求元四家山水氣韻深厚著畫徵
錄三卷續錄兩卷自言 國朝畫家徵其蹟可信者著於篇
其宗派何出造詣何至一一推測而論著之餘概從附錄而
止其謹慎如此又著畫圖精意識一卷以所見古人真跡推
論其章法起伏布置以古文法喻之能抉其精意其詩文曰
強恕齋集其後嘉興有沙神芝字笠甫爲篆書中鋒不取險
勢至鄧石如書出而風氣一變然沙書深穩純粹遺墨人猶

寶之其客盛澤沈氏停雲樓最久而長洲孫晉灝字補雲爲
八分書與汀洲伊秉綬錢唐陳鴻壽相頡頏黎里徐達源延
主其家若烏程沈宗騫昭文蔣寶齡皆先後來吾邑宗騫字
芥舟畫山水人物潑墨工筆各盡其妙書尤以古拙勝人其
刻石者有閣帖臨本鏤版者有閣帖考虛舟題跋學畫編各
書寶齡字子延客游以買畫自給山水特近文唐墨林今話
一書則繼張庚畫徵錄作也

方垌字子春浙江平湖人嘉慶二十一年舉人客授盛澤最
久與顧徵君廣譽相先後少嘗爲駢儷之文及古今體詩後
棄去一以程朱身心之學自勵其言曰外整肅而內虛靜是
謂居敬則一一則誠矣又曰動而有善惡當其靜未有不
善者也故周子言主靜靜則人生而靜之靜不與動對大極

吳江縣續志

卷二十四

人物九

三

是已後體驗延平未發之說益以深造自得攝武義縣教諭
邑有朱呂講學堂成公墓在焉垌纂明遺緒一以小學近思
錄教士以繼母憂去後選錢唐未之任卒年僅四十二有生
齋文稿

顧廣譽字訪溪亦平湖人優貢生成豐初元題舉孝廉方正
客授盛澤王氏在道光咸豐間雖盛暑不袒獨夜必危坐讀
經倣程端禮分年日程於宋五子書返諸身而實體驗之嘗
謂性情事物不可離而二之忽性情而求事物不能無駁雜
外事物而索性情亦不能不墮於空虛著學詩詳說三十卷
正詁五卷悔過齋未定稿七卷續稿八卷廣譽於毛詩獨精
詣自漢以來義疏及本朝諸家之說無不精考詳究折衷至
當其書數易稿而成粵賊旣平江蘇大吏延纂昭忠錄成上

海道應寶時延主龍門書院則以宋胡安定 國朝陸桴亭
陳確庵諸先生法而變通之定課程六則令肄業者準是爲
考課焉卒後祀本籍鄉賢祠與廣譽同縣人若賈敦臨賈敦
艮皆客授盛澤以文行稱元和朱綬謂敦臨詩深湛清靈無
叫囂恣肆之習敦艮爲古文宗法震川同治初復來盛澤仲
元熙其弟子也敦臨字蘅石敦艮字芝房

蔡升初字可階浙江德清人居盛澤不蓄妻子愛貓畜養成
羣各有字呼之輒應食必與共案善寫真高淡潔淨無比性
尤孤峭有不當意輒擲筆不肯畫及亂還德清遇賊死

陶淇字紹源自號錐庵四十後以字行浙江秀水縣人山水
宗法石谷作字尤工晉唐小楷生氣迴出與沈曰富陳壽熊
輩交及婁姚椿之門於學皆窺其藩籬而詩尤清遠高簡客

吳江縣續志

卷二十四

人物九

四

盛澤沈氏停雲樓最久遭亂游楚中畫名滿江南北而杭州
戴忠節熙江甯湯貞愍貽汾皆折節交紹源晚年境益困詩
多散佚遺墨人尤寶貴之弟溶字鴻上畫花鳥近甌香館作
字娟媚尤工小楷亂後亦賃居盛澤卒

陳春熙原名明賜號雪厂本海鹽陳氏自其父時流寓王江
涇亂後乃至盛澤工篆隸及竹石刻能於白竹扇柄刻士女
髮蓬蓬然作漁人荷釣竿狀釣絲搖曳如臨風也